

რაც უფრო შორს ხარ

რაც უფრო შორს ხარ – მით უფრო ვტკბები –
მე შენში მიყვარს ოცნება ჩემი.
ხელუხლებელი – როგორც მზის სხივი,
მიუწვდომელი – როგორც ედემი.

და თუ არა ხარ ის, ვისაც ვფიქრობ, –
მე დღეს არ ვნადვლობ. დაე, ვცდებოდე!
ავადმყოფ გულს სურს, რომ მას ოცნების
თეთრ ანგელოზად ევლინებოდე.

დაიწვას გული უცნაურ ტრფობით,
ცრემლით აივსოს ზღვა – საწყაული –
ოღონდ მჯეროდეს მე ჩემი ბოდვა
და სიყვარულის ღვთისაწაული.

1908